

意苕山館詩稿

意苕山館詩稿卷十一

元和陸 嵩希孫著 男懋修九芝校

辛亥

人日招同陸闡裁

毓元 程曉楓 爾亨

小飲

客裏逢春不當春與君同是故鄉人
偶聯官舍襟情洽卻話時艱感慨頻
千嶺好留殘雪在一枝喜見早梅新
草堂題句憑誰寄且領尊前笑語真

學舍淵源堂西舊有隙圃偶卽其地築爲書屋顏曰

卽吾廬詩以落成

做廬草草營聊藉蔽風雨三載迄未成
歸願歎猶阻人生無百歲戚戚亦徒苦
念古達者流隨遇便安處學舍雖卑

陋幸尙有餘圍建屋可數楹非必比環堵鳩工際歲閒敦
促免鼙鼓落成未弔月輪奐埒堂廡桃李舊成陰無煩更
移樹牆外竹千竿引之可當戶於此安琴書頗足任仰俯
茫茫六合閒何處真吾土所嗟髮皤然來日短愁數安居
定幾時一瞬亦千古雖云卽吾廬終作他人所夢魂欲何
之依舊胥江滸

熟荒謠

斗米二百青銅錢一生能遇幾熟年年荒望熟熟亦荒誰
家大戶稱多田可憐額租畝一石盡取輸官不敢惜官曰
我倉米已盈爾何不歸辦折色折色今年定起科八千一
石不加多負米換錢錢不足熟年亦作荒年過吁嗟乎熟

年亦作荒年過年更逢荒可奈何

程曉楓貽盆梅賦謝

夢探元墓梅暗香尙滿鼻醒來仍異鄉卻喜鄉人至貽我
雙瓷盆作供案頭置虬枝翦屈蟠老幹鬱蒼翠疏疏幾點
花已是春風試賞玩忘夜深牽觸彌鄉思縞袂聯翩翩疑
若瑤臺侍歸隱儻有期江頭定君遲

早春

回首鄉園又早春風風雨雨一番新儘多柳綫難緘恨饒
有榆錢不療貧典盡敝裘寒尙峭移將破榻坐誰親客中
況味知何似便許還鄉樂豈真

次韻酬張詠仙

春光到眼總成虛孤負年年此客居作計已非他日夢難
忘惟有故人書簫聲吹暖新晴候草色延青積雨餘病起
心情聊爾慰苦吟未廢五更初

鳴鴉

鳴鴉忽翔集鵙鵙欲引避雲路阻長風一枝歎聊寄豈伊
戀竹實族類竟忘異彼鴉徒啾啾非有遐舉志下上林木
間但自飲啄計搜捕盡纖鱗不遺螻螳細惡聲播遠邇衆
鳥亦爭棄繯繳豈知防傾巢將繼不見西風來雕鶚下
天際鵙鵙終道然萬里誰能繫

夜雨

夢回聽雨風颯颯動魂魄頻年苦水災哀鴻徧中澤民困

久未蘇盜賊充斥粵西數郡縣告警日傳檄堪更金戈
聲暗向檐前滴當階紅藥闌勤護費朝夕疏疏未作花摧
折那勿惜起看懶披衣餘寒布衾逼漂沒心更驚徑寸田
閒麥殘燈暗無光四望生歎息

謝子規

客中送客原無賴偏是今年幾度逢多謝子規啼不住一
聲聲到五更鐘

得張詠仙書

忽漫一書至開緘感不禁未忘平日願猶見古人心道在
貧何論交真語故深只愁身欲老徒自託哀吟

惜春詞

階前細草未全生春盡餘寒尙滿城無雨無風定幾日不
因時節近清明

衾單不耐薄寒加風雨連宵聽獨嗟可惜好春過已盡牆
頭未見一枝花

壯懷

壯懷慕舟楫欲作萬里行老去不復顧心結南山耕誰能
任意氣動與時賢爭方今粵東西照眼烽火明將帥屢更
置反側那盡平彼非逼寒餓性命誰肯輕長官苟能賢焉
用徵甲兵杜甫石壕吏元結春陵行手持誦不釋涕泗紛
沾纓艱難望急濟四海多俊英

有畫雞鷹同棲一樹者不知何意爲題長句

壁上何自來神鷹百鳥過之不敢鳴獨有雄雞樹旁立與
鷹相伴各不爭鷹雖矯健善搏擊似知雞獨備五德不忍
驅逐比鵠鵠毛血平蕪灑頃刻寫生妙手今久無細看令
我生悲鳴天生神物世豈乏真鷹曾見騰清都

長歌行

自從海盜弄甲兵商船來往多哭聲擄掠老少縱收贖婦
女不得輕捐生日久成風痛誰戢達官亦受金錢逼江頭
野老憤不平此恥何由雪朝夕嗚呼此恥何由雪朝夕天
地低昂日無色

乞食

乞食心驚滿路隅相逢誰爲立斯須莫嫌此輩渾無賴猶

是人間安分徒

漫道年荒民未飢相驅爲盜莫相疑君看烽火連天處行路何曾有乞兒

落花

爛漫春光未欲殘紛紛飄墮太無端也知地下難重好卻恨枝頭失細看錦檻懶尋蜂蝶暖雕闌愁倚雨風寒此情堪更明年想便到花時亦少歡

立夏日作

朝聽風雨聲暮聽風雨聲朝朝暮暮聽風雨九十日春幾日晴忽見堆盤櫻筍好豈是今年立夏早重衾坐擁愁復愁萬里窮陰欲誰掃嗚呼萬里窮陰欲誰掃起步空庭自

默禱

舟行見月

推篷起看月滿湖疑是老眼昏模糊沾衣欲溼霧初散雨
氣知已銷靡蕪舟人指點最高岸小麥青青望不斷安得
更放十日晴便可食新足吾願君不見粵西烽火四野屯
可憂何必非飢民

溧陽道中

一櫂重來髮已皤十年幾度此經過欲尋舊夢知何處千
古無情是綠波

抱城幾曲水彎環小艇如飛去復還遙望湖波通渺渺不
知何處白龍山

世事茫茫感不禁
蓬窗閒倚託長吟
高風千載誰重問
淒絕空投瀨水金

舟暮

夕陽冉冉欲下山
舟人相招爭卸帆
客心雖急奈何許
行路益知今更難
斷港支河少行楫
官塘亦豈無豪客
安得重如年少時
夜夜櫓聲聽不絕

送張詠仙之官隆平

儒者通經足致用
位望豈必鼎台重
縣令本是親民官
不負平生在此送
送君到官知何爲
君言自顧非吏才
一疏告神一示民
祇此可慰知已懷
我聞君語起三歎
近者憂勞正宵旰
州縣長官盡爾賢
滿地干戈亦奚患
自來燕

趙多悲歌君去感激知如何安得淩風埒雙翼從君一夜
過滹沱

再送詠仙

此日方看領縣符留君無計一長吁曾多憂患輕鄉里眼
識風波畏世途盡室北行勞僕從終年老病憫妻孥離情
直欲隨帆影自向江頭看到無

庭杏爲大風所拔

庭前杏樹高過牆我來作花方未央五月結子動盈斛兒
童飽食不可量不知何年受蟲蠹蘚皮剝裂無容光一朝
狂飆起摧拔土淺不復根能藏作薪可供數日用斤斧便
任丁丁戕此樹雖非松柏比伴我歲月亦久長眼前失此

百無賴我歸未得能無傷

蛛網

蛛網挂檐端團圓亦殊好所嗟腹彭亨志但營一飽蚊蠅
偶誤投得脫固知少其毒雖甚微有害卽當掃吐絲漫疑
蠶經綸自懷抱

趙心農

兆熙

罷官欲歸詩以寄慰

不道君歸反我先歸期慙愧說年年儒生豈解趨承急冷
宦原知去就便明月二分留客夢春風十載悵離筵獨憐
白髮衰親在菽水難懽一惘然

校定家集各書一詩於其後

四十方爲嶺外丞

集中

艱難一第恨偏增愛留潮惠人爭

說詩近韓蘇世早稱壯歲聲名悲藉藉暮年門祚感兢兢
可憐頭白諸孫在一讀遺編一撫膺

從曾祖退菴先生集林詩鈔

游俠空傳太史公一時朱郭漫稱雄結交四海豪虛負薄

宦三山遇益窮投老終乖陽羨願論詩早見濟南風竭來

清響樓頭望懷絕重尋六尺桐

從祖愛筠先生清響樓詩稿

嵩雲濟水雨漫漫卅載羈棲淚未乾幕府才空稱阮瑀重

泉名并負方干苦吟不廢生何補歸骨無期死更難留得

一編成底用可憐直作子孫看

從父寶研先生東游草

貧到無求亦可思并於詩亦不求知性情自寫忘工拙格

律誰誇任點嗤寄傲獨尋山水外長吟人想雨風時一編

重與挑燈讀始信臣家叔不癡

族叔介菴先生蠹餘吟

寄筠門弟

薄祿不救飢枉自天涯滯親族念故鄉存歿已半異幸茲
報滿歸得問諸昆弟雖尙三五人年齒不相比惟君自幼
齡同學頗能記淹忽曾幾時相看各驚悸白雪紛盈頭精
力歎久敝我家本素貧食腸慣能細自恥非分求非必世
同棄知君長杜門青草塞庭際此猶古人風末俗安得翼
我雖博升斗僅獲一椽庇歸期正難決望遠但隕涕耿耿
心所悲微獨一身計祠墓隔杭湖十年感缺祭近聞患水
災侵及墓旁地賴君率羣從往來費塗塹所願永此心歲
時勉同勵念自乾嘉來修葺不少替退菴與郁齋兩公實
相繼哀我兩先人夢寐亦交繫祖德今尙存我罪將焉避

凶荒歷頻年烽煙沉四裔陸行豺狼逢川遊蛟龍伺側身
欲安往性命螳蟥界終當釣竿營那戀尺組曳颯然秋風
來離愁渺誰寄相思寫無端賓鴻正南遞

哀張淵甫

又聽鄰笛過山陽故舊凋零劇可傷一代禮宗高密重千
秋詩格建安長淒涼教澤餘芹藻寂寞歸期誤稍染惆悵
去年江上別相望從此斷河梁

詠懷

洪鐘抱高響不叩那得聞笑彼手寸楹但以擊瓦盆豈知
廢縣下元音闕古塵鏗然偶一發驚聽空浮雲皋夔不可
見師曠亦陳人淫哇雜巷里民俗何由醇誰能揭日月一

照長夜昏草野非無賢抱膝甘沈淪

雲陽歸舟

一帆輕送綠波平正好新秋雨乍晴兩岸秧歌聽不斷夕陽還傍樹梢明

餘暑還愁掃未開忽聞隱隱動輕雷披襟自向船頭坐便有新涼水面來

得錢伯瑜

寶琛 中丞書并詩寄答

零落交游幾舊知郵筒遠寄慰相思聞將霖雨東山意自寫清風吉甫詞塗抹未忘貧病客艱難應念雨風時近來百事疏慵甚慙愧新詩報已遲

簡陳與三

巢許不可作滔滔安足論飄然東海蹈大義古今存恥與
從橫客徒誇富貴恩始知秦漢上猶識布衣尊

閩河決豐北口

豐北連朝朔風急掣動長隄溜欲奪居民慟哭聲震天倒
捲黃沙黯白日專制一道彼何人清泚銅池興方發頻聞
報險怒不解將弁遭呵那敢說中宵蛟鱷翻城頭勢猛誰
能遏倉卒人民廬墓無一完閩縣生靈化魚鼈制河兩府
亟馳省奔訴呼號聽憤切飛章入告邀 皇仁撫卹金錢
內府撥時過九月種麥難民食明年欲安出江南所重漕
與河百萬修防歲豈缺糾工集料幸勿遲水退庶免生理
失漕船得渡閩閩安毋再民力東南竭

欲雪

黑雲翳漫漫天意欲霏雪出門何所之四望心憂結相逢
有道士衷曲話切切世事幾變更天道有盈絀朱顏不久
留盛年感衰歇際茲歲云暮淒氣逼心骨忍飢得閉門布
衾奈如鐵羨彼蓑笠翁釣竿自閒拂亟望春陽同堅冰煥
活活且得川源通毋使道途絕

喜董甥

兆昌來

長途冰雪裏不道汝能來相見各悲喜此生能幾回青雲
期白致白髮恨頻催慈母煩歸告離懷且暫開

除夜

風雪連朝急驚心歲又更幾州猶患水四海未休兵感慨

餘長劍憂危獨短檠自憐青鏡裏白髮逼羣生

壬子

陳梁叔計偕入都留宿贈行

貂裘已敝欲何投且喜荒齋數夕留商略尙煩千載業艱
難奚止一身憂漫天雨雪愁長夜徧地風波奈客游聞道
長安非舊日歸期莫更指深秋

點兵行紀金沙事

客從金沙來爲言點兵事兵威久不揚乃欲鄉民示鄉民
輸官糧倍額亦云至縣吏苦誅求橫征自無忌諱然官倉
閒豈便非常致胡爲遽相迫爲盜此亦易近來牧民官動
與民爭利禍亂所由開豈皆出非意頗聞粵西東轉餉正

難繼奈更妄稱兵邦勿心憂悸此幸免揭竿造福已非細
更望賢有司民艱急同濟

悼張詠仙

經年不見君昨夜夢君至慰勞猶平生肝膽握相示雲山
隔千里豈有凌風翅醒來正驚疑忽報隆平使莅官未三
月勤事已畢世頗聞隆平民走告共涕泗抱負空悲君垂
老僅一試他時循吏傳知入君名未彷彿憫時懷縱論看
裂眥青楓白楊間悲風骨酸刺生芻蕘難將歸櫬痛猶滯
夜夢忍再尋江頭更誰遲

籬下見牡丹一枝時雨初霽嫣然有可憐之色

一枝忽向雨中新籬下如何見太真別有色香尋未得漫

嫌穠豔洗教頻洛陽風景愁非舊江左繁華惜已陳莫怪
今朝看不厭此花開後更非春

聞桂林警

無日不戰戰必克殺賊朝千夜八百胡爲賊勢愈獺猖使
我聞之動魂魄永安州城大如斗五月誰憑賊堅守開門
突出竟莫當鎮將材官死八九妖氛更報桂林屯城中火
發脂膏焚賊無所利自引去督師又見論功勳

讀孟有感

胷中無古人自待焉知厚營營利祿聞熏灼歎已久廉恥
旣寡鮮氣節欲何有子陵卧桐江徵聘謝不受東漢治道
隆相佐實此叟宋興用論語太平致反手此言豈虛僞名

世出非偶諒由讀書多淑身識尙友人苟有不爲誰肯比
妾婦反覆孟子篇浩然一同首

謝王研雲作先君子周官集義序

儒生務通經謂能措平治官禮出周公太平所由致莽歆
雖竄亂末學敢妄議慨然念先人日讀手不置上窮教化
源下挾法令弊方今亂天下禍莫甚胥吏往往憤所切立
說發經義援證本列史殷監實此繫異彼炫博徒搜考但
瑣細坐言起可行數奇空齋志遺書幸未失撫卷輒隕涕
當代數經師惟君默心契一序感援筆千里遠相寄敬錄
付子孫不朽當世世

輯族譜成書示族人

親親自近始遠亦焉可遺支派既日繁情義恐或離獨賴
有譜牒得免途人譏吾家起耕讀鼎盛康雍時清名被海
內匪獨鄉里知今雖漸衰歇禮義猶相維亟當述祖德以
爲子孫貽區區論著代所感亦已微

人貴能讀書非獨取科第胷中多古人自與世俗異語言
面目閒便有藹然氣教知先父兄率自謹子弟庶幾尙廉
恥毋但徇名利吾家雖清貧詩書未嘗棄澍漓久成風漸
染或忘做所願各兢兢祖澤守勿替

風詩采雞鳴士女皆稱賢諒由儉勤俗必自門內先婦女
不讀書所見多近偏私意各自蓄積嫌起豆籩誼或昆弟
薄禮並長者愆教之貴由豫勿謂此芟芟吾家多賢母令

德宜同宣世世苟相繼足以慰重泉

吾家先人墓迢迢隔吳興祭埽我久缺魂夢時暗驚念彼
若敖鬼道遠何所憑尙謂歲時際不廢嘗與烝自顧得毋
愧怨恫知日增昔賢誓墓意豈勝繞樹情先訓述往復此
恨時填膺明年定一櫂苕水浮泠泠

河復決

黃河之水西域來東行入海經大伾自奪汴濟日南徙橫
決時爲居民災百餘年來險屢薄畚築旋看隄成圍奈何
客秋潰豐北臘盡不得狂瀾回經春歷夏復百日運料堆
垛千夫催合龍指顧忽風雨塞口衝突驚重開桃花新漲
正瀾漫盛夏勢愈喧騰雷治河使者少長策金錢百萬成

飛埃中朝何人主海運遇此奏上誰能違漕船水手近十
萬失業剽掠官何爲堪更災黎徧遠近安集靡所將其危
敢告當事亟儲費興工毋再幾宜乖不然改道順水性禹
蹟厯厯可尋追北河水利更修復轉輸畿甸無盈虧河工
歲可萬緡省官侵吏蝕民空哀職方九州試稽考宜稻豈
獨東南推

姚杏士

燕穀

剪蘭相贈

招隱誰歌漁父詞西風楚畹最堪思煩君翦取秋香贈奈
此傷離怨別時

喜雨

驕陽虐當晝田禾欲盡槁非獨畏暑偏望雨愁心擣四海

方苦兵民食堪不飽彼蒼幸垂哀飄然轉雲旄雷聲漸隆
隆檐溜急如倒絺綌不御風牀榻埃頓埽枯苗有生意鄉
農慰默禱我雖半畝無欣欣亦懷抱願更霈澤施萬里沐
鴻浩劍戟鑄農器老死各相保

程曉楓惠新芡

兀坐無聊動客愁陂塘雨過正新秋憑誰細語鄉園味菱
芡朝來滿擔頭

此味拌將夢裏嘗何緣相贈感盈筐明年歸計真能穩飽
食思君定不忘

贈別姚杏士

蓬生亂麻中亭亭自不恤風雨忽摧之欲使寸寸折諒節

今誰誇柔姿世爭悅昂頭望天外黃埃蔽白日非無盤空
雕燕雀肯相匹翻然颺晨風滿眼動蕭瑟區區彼雞蟲焉
事爭得失君方筮獨行我亦占夬決蒹葭秋水閒釣竿願
同結

詠露

秋氣潛深露欲微空山草木自知幾膏曾同被功原溥天
本無私候漸非捲幔但愁風獵獵溼衣兼恐雨霏霏金盤
盛得知多少徧灑人閒願已違

秋興

新霜一夜下重霄催動人閒萬木凋亭館淒涼非舊日雨
風蕭瑟更連朝蛩聲繞砌宵砧急雁影橫空客路遙幾度

故園回首望十年蹤迹滯金焦

曾經烽火照城頭蘆荻橫江尙帶愁挾彈探丸何處少調
兵徵餉幾時休天山六月常飛雪滄海千秋自橫流北極
浮雲遮莽莽不堪重與指高樓

狂飆動地怒蛟龍又報金隄失萬重徧野哀鴻愁集木極
天飛鳥避傳烽但教領郡皆劉寵何事籌邊想耿恭太息
時艱誰共論兵荒頻遇鎮坤坤

天塹長江自古今六朝舊迹感重尋龍碑古寺何人護
輅空山幾度臨草木百年餘氣象風塵四海託歌吟劇憐
病骨支離甚不獨秋來愴客心

聞城連陷郴永復據道州憂而成此

驚傳陷柳永賊勢愈蔓延道州最貧苦亦不蒙賊憐督師
駐何所持重不敢前州民被淫掠慘毒知難言賊來爭赴
死賊去豈自全諒無元刺史哀痛傳詩篇勦撫兩無策念
此空涕漣我朝正全盛非比天寶年世豈少李郭威望傳
諸邊爵賞況不惜感激宜爭先削平望朝夕耕鑿安堯天

種菊

自向籬邊種幾枝開遲拌待晚秋時冷香傲骨誰能賞
憔悴西風祇自知

寂寞疏籬性自安底須密密護雕闌只愁誤入朱門裏
桃李紛紛一樣看

落英裊露藥囊聲會入神農本草經莫道但供騷客玩此

三才集言卷之一
花能與世延齡

獵獵西風撲面來就荒三徑滿蒿萊當時誤殺陶彭澤歸去從容手徧栽

浮生

浮生歷歷誤風塵自信逢人祇一真多病可能工入世不歸何敢諱言貧感時有淚虛前日沒世無稱負此身容得荒村廬共結往來還欲問朱陳

丹徒訓導程爾亨治官解於壽邱山麓得片甃上一宮字儼然可識下二字則隱隱若壽邱此山本季奴故宮當是劉宋所遺甃古可愛琢以爲研并拓本裝治徵詩作此貽之

壽邱山頭落片甌風雨剝蝕體不完上一宮字儼可識疑
是劉宋所流傳劉宋築宮枕山麓何年廢作丹徒學程君
治廨喜得之剔薜摩挲看不足慨然銅雀思高臺臺傾碧
瓦埋蒿萊千餘年來製作研珍愛不數端谿材此甌治研
亦良好羨君得此真堪寶裝成著墨潤且溫濡翰淋漓寫
懷抱吁嗟王氣當時收斯甌何幸今還留長江天塹那可
恃千秋興廢應同愁

書彭躬菴遺集後

有明三百年享國比唐宋徒爲虛僞人一朝竟斷送集中語
躬菴一諸生於世未嘗用迺爲此憤憤持論輒感慟始知
讀書多所抱自殊衆廉恥苟淪喪名節焉知重上下利交

卷十一
征孟語實堪痛今古豈有殊乾坤自瀕洞安得百躬菴喚醒此夢夢遺集幸未湮慷慨夜深誦

慰友

漫游意豈適役役徒風塵矧茲時序改可悅非陽春念彼邱中士夙抱空今人邂逅未一遇寂處甘沈淪譬若梁棟材失時摧爲薪何如老空谷自得全其真古來不朽業豈不在一身操履苟無失顯晦安足論請看江海閒風浪驚翻頻願君礪堅節共此冰雪辰

陳書巖之瑩

曾參裕節愍軍於四明追繪從戎圖以

紀事索詩

寶刀脫鞘腰閒橫知兵何必非書生君沉韜略授昭勇

謂楊

公遇 請纓投筆原生平憶昔烽煙起南海督師當代稱豪
英誰參軍事比陳阮得君氣槩千人傾飛書草檄日旁午
感激誓欲驅鯢鯨奈何海潮夜深長險失招寶輪船乘普
陀三鎮一朝歿援絕鼓死空堅城指麾巷戰月昏黑淋漓
血濺衣猶腥三軍解散督師殉喪歸千里銜哀聲君雖護
持自終始怒氣未息長撫膺彼哉醜夷那足道曷爲所向
鋒難嬰可憐長江竟深入殺氣直使金焦騰我時奉檄募
洲勇短衣出沒風濤輕腐儒懷抱敢君述惟此患難嗟同
經相逢把臂話涕泗十年幾度須眉更君今琴堂播雅化
耳畔無復鳴金鉦雄心未已髀時撫追思往事徒沾纓繪
圖示我感更感坐望四海長澄清

程曉楓出示其師朱笠仙印譜徵詩余不識朱而重
曉楓之篤於師誼也樂爲題此

蒼聖造字去今久降而篆刻溯授受冥心師古識幾人一
藝能傳定非偶程君爲我言其師書法兢兢奉顏柳餘事
工此亦絕倫鐵畫銀鉤世何有恨年未永知者希印譜搜
羅賴君守攜來示我屬題句鄭重遺函比瓊玖嗚呼世風
日以衰反覆交情那知厚如君用意真古人把玩終宵忍
釋手我於此事心雖盲感激因君念取友朱生朱生獨何
幸名氏千秋乃不朽

得都中友人書卻寄

無聊還作薊門留驚喜開函涕泗流讀史忽深興廢感放

歌難寫古今愁浮雲莽莽連長道落日荒荒下戍樓豈獨
相思忘未得要憑心事證千秋

久旱望雪

東海癡龍鞭不起百日不雨井見底紛紛爭汲連泥沙城
中居民乾欲死前年淫潦過九月愁苦低田猶積水可堪
旱魃復今年肆虐無端乃若此舉頭烽火況楚南告警倉
皇正邊鄙道途擄掠日夜聞動色相看戒行李閭閻所恃
惟年豐忍使災荒告無已傳聞擔水需百錢耿耿心憂倍
鄉里安得瓊英霏滿空千里浮埃盡一洗勺水入口勝天
漿起視彼蒼淚瀾瀾

擬杜諸將

滄溟一自息鯨鯢烽火連驚照粵西推轂屢煩更將帥盜
兵誰復閔蒼黎關山峻險勞戎馬郡國誅求動鼓鼙朝議
若還窮禍始未愁莽莽陣雲迷

憤切同仇定幾人捷書屢布尙風塵軍資團勇招徠雜路
滿逃兵劫掠頻賊退論功多健將城空議卹少遺民無端
便欲珠崖棄深算奇謀是老臣

上相專征位望隆伏波銅柱想元功裹糧坐待全師老堅
壁偏誇百戰雄楨幹芻蕘儲欲竭蟲沙猿鶴化愁同臨危
獨有全州守援絕登陴恨未窮

一州斗大永安城陷賊何堪雨雪更笳鼓寂迷臨水陣旌
麾遙隱隔山營 璽書絡繹還加勞傳箭倉皇祇共驚夜

平何人窺賊壘銜枚疾走更無聲

衡山漢水盡雄疆豈獨崎嶇桂嶺長備敵但求嚴鎖鑰縱
焚先已痛崑岡連車裝載爭戎馬繞郭淒涼卽戰場滿目
瘡痍誰共卹甲兵終望洗銀潢

王暨方孝廉以其先人亥坪司馬行狀見寄慨然題
此

富教商聖賢切切匪自今誰能任民牧各有保富心君家
先司馬念此憂偏深世風慨日薄法令窮黎黔自非振教
化何以全林林初來莅斯邑治但聞鳴琴政暇感相過異
豈忘苔岑迂遠世爭厭慷慨先投簪君看金焦間何處猶
鵝音父老想遺愛日憩甘棠陰讀君所爲狀涕淚交盈襟

相知況如我惻惻那自禁

憶邵子顯

身世原如一葉浮淒風苦雨不勝愁客船今夜知何處定泊辛豐古渡頭

題張孝女遺像

女名婉父祈孫鴻基吳縣諸生嘗遊閩未歸女以思親致疾及歸旋歿女哀未已亦歿未踰月也歿後其弟廷薰繪像求題爲賦此詩

閨中之才誰最清張家有女婉其名可憐詩名人未識命苦乃以孝女稱孝女思父病削骨孝女哭父淚成血骨銷血枯命隨傾孝女之苦那可說孝女工畫兼善詩畫傳阿

母詩父師一門風雅盛今日孝女不死人得知我悲孝女
正無已細訴還逢孝女弟繪像求題慰阿母往事重論自
隕涕性情如此豈不真孝女身死名長存令我濡毫意惻
愴世風澆薄思同敦

意菴山館詩稿卷十一終

孫潤庠曾孫家振校字

意茗山館詩稿卷十二

元和陸 嵩希孫著 男懋修九芝校

癸丑

元日紀事

警報俄傳失武昌曉鐘未動夜無光朝回他日人何處愁
入新年我亦忘烽火連江驚照耀車聲繞郭聽郎當紛紛
遷徙空門巷誰更泥金字貼黃

黃序村示諸父老

寇氛日以逼奔告羣相驚長江縱稱險城守無餘兵團勇
議孔亟應募人紛爭彼非盡土著各有家室營獷悍儻衆
恃禍亂愁先萌妄意聚此族何若彼蚩氓緬想兵農合周

官法原精制挺起田里未嘗廢深耕自從持戟士別設郡
縣營平時任驕惰有事誰干城甚者肆淫掠慘苦隨所經
四境苟各保聞警鳴金鉦賊來不敢犯焉用兵交徵奉檄
召父老欲語先涕橫同仇願憤切毋使虛堪乘憂來鎮不
寐愧此終生纓

雨中赴寶晉洲

荒村雲樹連沙洲雨風黯慘迷江頭小車泥滑行不得十
步九折心煩憂褰裳欲渡少舟楫蛟舞鯨呿蹴波立機槍
萬丈光滿天躑躅郊原自飲泣

鳳石齋梅花盛開詩以自傷

春光依舊客無家來往沙洲祇自嗟一夜雨風聽不得朝

來還起看梅花

驚聞金陵被圍望官兵不至

潤州沂金陵不滿二百里傳聞被賊圍驚惶日數起方疑
九江閒扼要重兵徙東西兩梁山相望勢角犄大帥正
新命威望亞夫比何能任賊艘揚帆自飛駛豈知萬人雄
竟失當關恃倉皇古帝都慟哭頓衢市閔念深 九重飛
章告奚俟斧鉞早遽頒戎車應亟止奈何效賈胡逗留尙
邊鄙石頭城雖堅環攻保無圯東下苟順流蹂躪將安底
危哉此孤城固守痛誰倚

二月二十二日鎮江失守書此誌哀

朝聞鼙鼓江頭來暮看樓閣成飛灰城中居民冒鋒鏑扶

老攜幼奔哀哀可憐駐防二千甲流血傾刻盈衢街江中
戰艦僅六七衆寡不敵帆爭同金陵陷賊未半月何遽鐵
甕城連摧武昌重兵數十萬奔竄誰令疏重圍聯檣東駛
況千里扼險豈少干城材奈何江南賦財地輕棄直欲同
荒陲陶侃邯鄲石頭大瑛瑄得免陳濤悲 廟堂宵旰念
方亟斯民水火拯知難金山北固盛千古傷心竟作阿房
災腐儒痛哭亦何益紫氣終望回三台

訪劉雲卿

通

消息不得逢其令弟劉六

一別干戈裏傷心已暮春相逢惟令弟苦語說衰親涕泣
書難達驚疑夢豈真亂離知未已消息問何人

見燕

愁見春歸楊柳梢
綠陰門巷
冒蟪蛄傷心
輸與田家燕
猶得銜泥補舊巢

村寓雜感

一自妖氛逼漢陽
江東十郡盡倉皇
儲胥紛護愁郊野
將帥頻更警廟堂
戈戟萬層連幕轉
旌旗千里蔽江長
如

何竟棄盧龍
塞猶道知兵是陸郎

何堪回首武昌城
烽火遙傳日數驚
北固樓臺橫殺氣
南

徐草木走風聲
郵亭經月閒馳騎

九江於正月
中已斷文報

山谷連疆

撤戍兵愁絕長江
那可倚不教飛渡
一帆輕

郡邑江南盡戒嚴
日光黯淡雨廉纖
流離遷徙鄉村徧
負戴提携婦稚兼
官吏無權容劫掠
道途多警費逃潛
王師

十萬屯何處望斷雲霓歲月淹

雨雪連朝霽乍開臨江使節自西來弓刀路夾喧潮勇柳
鎖牢空釋盜魁城郭徧巡看糾健閭閻驚告共疑猜行營
幾度遷無定自衛何嘗竟少才

都護威聲問孰同自言西域有殊功高居帷幄兵愁少坐
擁貔貅餉慮空決策但憑房琯客磨軍那慕謝安風固山
牛彘今何在始恨臨危誤乃公

郡齋闐寂柝聲高旁午軍書少捉刀籌畫芻糧紳富雜編
排保甲士民勞江防宜亟翻移礮城守誰謀但掘壕短簿
髯參空幕府相看無計首頻搔

借箸頻煩桑孔心憂時還讓謫仙深

謂李雨人學士

地當衝要姦

難詰邑有豪華力易任幾費捐輸空寸紙各私保衛惜千金庸知一夕家仍毀紅燄蚨飛恨不禁

虎踞龍蟠舊帝都崔巍雉堞想雄圖重臣分鎮防原早勁旅聯屯勢豈孤誰道帆檣馳絡繹頓教雲樹失模糊一時白骨堆狼藉痛哭圍城十日無

鍾山烽火乍驚傳鐵甕孤城望裏縣出塞班超虛驛騎橫江王濬少樓船連營鼙鼓朝方急一炬亭臺夜盡然曾是舊時征戰地可憐流血尚盈川

潤州帶水接揚州相望嚴城雨夕休殺氣萬重騰日暗哭聲一路震天愁呼號莫效張巡守嬰鑠徒貽馬援羞從此竹西歌舞地夜深燐火照邗溝

殘慘傳來實可驚殺人如草更無聲
執兵忍使兒童戲魔轍悲教婦女迎
尸積如山供啄雀血流成海任吞鯨
邱墟城郭知同盡莫訝長平一夕坑

蚩蚩奔走欲如何世變悲深涕泗沾
誰識安居蒙叅養妄思賄賊息干戈
壺漿竟作王師勞耕鑿偏忘帝力歌
寂寞揚雄同一歎相看豈獨亂民多

烈燄相望日夜騰青山何處更嶙嶒
拌將勝蹟千秋盡賸有江流萬古仍
地軸怒搖川谷動雷車驚走雨風乘
初地連大震旋大雷雨劫灰莫更昆明問
西域如今少異僧

推原禍始豈無由諱盜成風久共尤
搆獄況堪胥吏急冒功直欲士民仇
采薪蒸粟三年苦枕戟眠戈四海愁
一水

涓涓看不絕滔天已是滿洪流

洪逆之起由冒功構獄首激成間番累孝廉云

朝議何曾薄賞功

國恩能報幾人同巴圖魯號頒驚屢

遏必隆刀佩得終舊將更聞徵里第故侯又見起關中倒縣此日憑誰解一任遷延恨莫窮

礮利船堅舊共知江頭重見火輪馳豈因戰伐勞諸將故遣蠻夷隸水師破浪不憂蛟沒險轉帆驚訝鳥飛遲只愁後日驕難制回紇前朝事可思

艇勇何人募海中居然赴義自稱雄高桅蔽日連江黑巨礮轟雷入夜紅破賊但憑金寶奪還軍肯羨爵官隆東南後患知何已終望王師早策功

諸將方誇百戰勲寇來還避向家軍誓師慷慨心原壯握

節倉皇勢豈分鎖鑰忽驚三郡失舳艫先報九江焚專征
恩重應無負亟爲驅除答 聖君

旌麾忽報馬陵屯位望雲臺鄧禹尊道路漫傳軍令肅川
原應見賊塵奔兼旬坐鎮師愁老四野生悲淚暗吞毒霧
漫天消未得幾時一戰靖花門

潦倒吳門一腐儒青氈坐敝自知愚無才敢望艱虞濟垂
死何堪喪亂俱遯野中胥誰共哭登城倉葛願同呼此情
獨有楊修識慘覩紅旗落日餘

時與楊子城子安謀募義民助官軍攻城事

示楊子城

彭齡

茂才子安

履泰

孝廉

江頭遭殺戮尸積水不流官軍望未至慘慘心獨憂豈無
忠義士憤切知同仇偉哉二楊子遯迹來荒陬相逢各慟

哭血淚看盈眸 聖恩被草野深厚逾千秋彼雖少知識
耕鑿安何由奮袖一呼喻感激生鉏耰誰言世非古竟少
田橫傳義旗快同舉浩氣凌斗牛羣醜庶盡殄餘孽毋教
留凱歌願早聽過此重優游

偕楊子安至諫壁宿常樂寺

驅車遙望處火未息連城殘慘心同憤流離夢各驚世衰
輕赴義身老敢論兵此夜招提宿相看淚滿纓

西南門行

西南門外兩日火夜半光騰到卓午自從賊船來江頭北
固金山盡焦土雕牆峻宇且勿論傷心蒿目尤蓬門幸免
殺戮竄荒谷餘生知幾聲酸吞遠望官軍一水隔旌旗不

動哀何人

哀駐防

君不見京口駐防蒙古營府開都護輝旗旌長江天險賴
保障訓練豈必忘承平寇來倉卒勢莫扞烈火光中自驚
竄血膏賊斧知何由搜殺還教徧里閭殘軍收集繆甸屯
誓欲滅此憤各伸昨朝遇賊北門外揮刀奮殺肯顧身強
兵坐擁欲誰咎死者何堪更八九早知殺賊本不難悔不
孤城共死守吁嗟乎到處孤城肯死守哭聲何得來京口

輪船行

高桅聯屬來江濱黑煙萬縷衝青雲巧製機括自旋轉風
同火激扶金輪十年前曾此停泊竊弄兵革災生民今豈

中華居已久漸染風化知尊親蠻夷效順 聖德遠犬豕
敢肆鯨鯢吞中流遇賊一轟擊遠近觀者皆精神奈何屯
泊但遠港一步未過金焦門往時勇健孰諸將今何畏蕙
同官軍大營經月令不發顓愚那得知其因兵貴神速豈
虛語亟望指顧清風塵

懷陳與三

聞道沙洲住遭兵又屢遷烽煙仍郭外消息斷江邊世自
輕毛遂人誰識魯連定知悲憫意說著涕漣漣

趙生行

生名玉芳丹徒縣人城陷踰二十日官軍始來來則觀
望不戰生憤名洲民之素習武事者五百人介余投太

守豫

立

所願首攻城以死自效太守許其請已而悔之

生與五百人俱哭而歸爲作詩以紀其事

嗟哉趙生爾何哀拔劍哭向江頭來眼看殺戮徧郊野骸
骨堆塞無人埋官兵十萬駐城下雨月未見戈交揮水深
火熱痛誰救報國豈竟空奇才知爾忠憤積難遏殺賊誓
欲摩重圍高牙大纛自閒暇獻策那得軍門開短衣徒步
少人識遇我涕泗紛胷懷黃雲莽莽慘行路白日黯黯愁
飛埃拂衣歸去色沮喪狂歌休上摩雲臺古來志士豈獨
爾姓名幾見千秋垂田橫之島望何處傷心東海滄溟回

喜聞六合縣事

三城未復賊紛竄揚帆徑抵六合縣六合縣城陋且卑兵

不待交定先亂豈知縣有溫大夫與民一心民不渙賊來
躍馬聲大呼衆集糧鉏助攻戰奮勇不避曳落河橫刀肯
識哥舒翰區區螳賊安足論流血已見滿江岸高桅大筏
一炬焚殺氣直上衝霄漢三年以來無此敗賊中語賊膽欲
落賊魂斷所遇盡如六合溫從此南人不敢叛重兵坐擁
彼應慙何日憂懷釋宵旰

午日

眼看令節淚模糊角黍堆盤事有無惆悵綵囊誰更製全
家祇佩避兵符
榴花紅向劫灰餘競渡遺風說已虛多少冤魂江上泣底
須重與弔三閭

贈曹少秋

坦茂才

相逢何暇訴離情
把臂先看涕淚傾
失路已知悲阮籍
陳書還欲望陽城
憂來不斷心如醉
憤到難平夢自驚
試問逍遙河上客
幾時殺賊肯揮兵

自黃序移寓諫壁

憶此移家暫避兵
往來雨雪自心驚
可堪桃李花開盡
又聽村村打麥聲

茫茫何處有安居
燕幕風來欲墮餘
始信橫流滄海日
此身只合託牛車

書生家具本無多
薄笨聊驅八口過
若使移家圖更寫
可能傳出涕滂沱

寄懷程曉楓

戰鼓聲中送爾行登車揮手此餘生
劇憐烽火艱傳驛差幸鄉關未被兵
流涕卻看妻子在相思時覺夢魂驚
孤城收復知何日終望君來一請纓

次韻酬楊子城

感慨蘧廬風雨中誦詩愁欲廢車攻
怕將冷眼觀時局幸與知心話素衷
絲染縱能分黑白鳥飛誰得辨雌雄
何當招隱君同賦一問縣瓢荷鍤風

京口從軍曲

東風何處繫班騅辛苦從軍且漫悲
省識江南好風景泥人一路綠楊垂

旌旗十里自飛揚指點金焦隔岸望落日江頭閒牧馬英
風誰與話蘄王

嚴肅誰誇細柳營威名人早說專征寶刀肯殺尋常賊盡
日橫腰不一鳴

宵深刁斗寂無聞閒殺江頭片片雲一笑何人能破賊傾
城應待美人軍

剪刀新罷七張機稱體裁縫鐵甲非一語故園應早寄西
風休更擣征衣

迢迢桑梓共湘衡遙望長江一道橫憑軾請觀原是戲何
妨杯酒話鄉情

寄姚杏士松江

城空無人人盡鄉三月不見天日光眼前百事不置意獨
有故人心難忘故人相隔渺何處一水遠望蘇臺長自從
前年別我去寇警已是聞衡陽太息招隱願未遂鼓鼙聲
遽騰倉皇石頭墜城陷一夕金焦雖險何能障橫尸流血
徧遠近哭聲震路愁青蒼蘇臺是我故鄉里聲聞擊柝應
嚴防君無寸權那可說遷徙得免心旁皇三泖湖波深且
闊其中亦慮蛟螭藏近得君書說好在低同世事徒激昂
我雖賊烽幸此避火炎日夜憂崑岡官軍未聞殺一賊經
歷春夏虛糜糧便思糴鉏耨田里赤手焉得驅豺狼孤城
賊據亦無賴漸聞江上帆分揚彼但剽掠豈有定肆凶深
恐移蘇常昨傳西去犯滁泗東海或免狂瀾殃長歌當哭

爲君告仰視白日悲茫茫

贈劉伯純勳茂才

攬裾雖恨十年遲猶得相逢患難時詩自能工偏我好才
因未遇少人知嵇生幽憤書空著阮籍窮途酒不辭阜帽
便教歸竟得此情他日總堪思

長松行

長松作勢高插天廕底遠踰二百年童童車蓋昔何盛鸞
鳳栖息常其顛豈意霜雪厯今日蒼翠忽若有變遷斧斤
外斲螳內蝕幹枯根撥何由全吁嗟乎幹枯根撥得自全
我來偃仰涕泗漣

感事寫憂得五百字比於阮籍詠懷子昂感遇冀見

者有以哀其志焉爾

哀哀鎮江城陷賊逾三月城中慘殺數十已不存一存者
爲炊爨生死那可必日夜望官軍便與水火出遙遙見旌
旗延岡樹崇密軍令聞頗嚴輕敵戒馳突奈何西北門剽
掠任獠猓婦女多哭聲閭閻少完室兵賊漸不分欲語先
播舌有客邗上來遇我意勃發勸我且勿悲一言試聽述
主將本故侯威名久撻伐去年滇中番掃除迅斧鉞英夷
昔稱強輸心北回鶻蠹賊此區區一鼓豈難滅持重不一
戰深謀肯輕洩蚩氓焉得知慟哭望誰活 皇朝盛武功
開拓邁前列柱標珠崖顛馬飲長城窟褒鄂皆淩煙杜房
盡密勿百年致太平四方自無拂 聖德今豈忘報國少

豪傑偉哉張嘯虎挺起自蓬華非有朝命隆乃獨同仇
切憤憤此堅城久據縱羣孽奮勇竟先登呼聲動倉卒大
兵苟相繼盡殲定倏忽巷戰接短兵流血染白骨滿地仍
豺狼此恨那可說客言聽未終我腸斷嗚咽覽古忽興慨
治亂每同轍安史陷兩京乘輿致遷越禍始識楊釗中外
恣交結儻先雨觀誅姦謀燭早遏雖無郭與李神器敢窺
竊不然敦峻徒跋扈少臣節立朝非羣賢何以靖宮闕攘
攘但黃巾勦撫況多術厭亂終天心民命未應絕羣公且
莫憂金甌正無缺自我居黃序私衷日如惓茫茫滄海流
慘慘虞淵日厠身天地間眞若戰中蠱妄欲尺寸槎往濟
風濤闊虛聞鼙鼓聲動忘涕橫溢感彼綬組侶制挺起相

率徑思縣布乘更欲螯弧奪忠義自草野權勢謝朱紱養
寇知何心 恩勞尙綸綽天闕儻可通排雲叫何恤

陳與三自連城洲來卽送之吳門兼懷邵子顯

近聞江上多哭聲剽掠不辨賊與兵相戒不敢近北郭郭
外時見尸從橫君從何處一帆挂渡江得勿金焦經上有
老母下妻子奈何性命鴻毛輕看君豪氣尙如昔縱談世
事心難平公超毒霧豈難散張角斗米知何成眼看城市
踞豺虎誰與江海驅鯢鯨便思自拔要離劍徑起盡掃旄
頭星朝廷故事君豈識奇勦要必由公卿吾儕身賤安足
道平生肝膽將誰傾不如張口但飲酒焉用衆醉我獨醒
飄然辭我竟東去計日應到金昌亭我歸未能起歎息夢

魂定許隨君行。蜚江若更卽平遇。爲道跡迹今飄零。

壯士歌爲鍾孝廉淮作

江濤夜涌風怒號。壯士起看腰間刀。翻身殺入賊營裏。輕
若俊鶻穿雲霄。呼聲動天天驚裂。壯士力竭氣不竭。血流
被體刀尙揮。馬革早拌裹白骨。瓜州一水控鎮揚。勢據南
北通津梁。奈何要害任賊守。使我壯士心悲傷。嗚呼壯士
知誰是孝廉。名淮鍾氏子。斷頭將軍今不聞。一死獨爾光
青史。

次韻酬劉伯純

鬢絲休惜鏡中摧。意氣如君亦壯哉。卻話艱虞成獨感。能
談忠義卽奇才。幾時毒霧南方散。回首浮雲北極開。鷹隼

高秋應共擊搏風羽翼願先培

江南三城不復賊又陷廬鳳犯歸德

廬鳳遽殘破商墟復馳突賊勢彌中原浩蕩欲難遏虎狼
所經過不知幾城闕豈獨江南郡羣盜尙蟠結衛霍彼何
爲優游自歲月 宵旰憂空深轉輸歎欲竭莽莽黃河邊
風沙捲白日哭聲動天地哀哀少人恤慎勿望官軍官軍
不可說但能奮耨鉏焉慮賊不滅

思歸示諸賢

我本浪游客便習車與舟冰雪鍊筋骨辛苦忘白頭避亂
此聊適幸遇諸賢游清風扇几席皓月臨衣鉤偃仰得自
如於我知何求忽焉動鄉思道里原非修雖少釣游侶豈

無冠童儔烽火沉未息薪木能無憂恐此朱陳村終亦難
久留必若詩興發且爲王子猷

紀六月十三日兵變事

王師浩如雨盪寇來朱方借問主將誰云是鄧紹良起家
自微弁三載經戎行厯官至提督寵命逾尋常國恩
定無負盡賊人爭望奈何積三月不一窺城隍淫掠縱麾
下豈獨虛糜糧遇賊輒投戈交口呼同鄉杯酒話城下賄
賂驚相將謗言起遐邇民怨知難防營中卒火發先賊趨
丹陽幸逢鄉兵截勢得安倉皇久聞金焦閒來往空舢艫
西去犯廬鳳留者難稱強不然傾城出其鋒誰能當可憐
視犬豕猶若同豺狼調兵更省會絡繹虛聲張何當棄師

罪據寶騰封章倒縣解何日得問彼蒼蒼老夫憤空切涕
淚沾衣裳

瓜州歎

潤州六月尙賊據揚州亦未罷官戍江南江北通片帆來
往公然任朝暮寇援宜絕豈不聞誰握兵權儻早悟便應
先揮江上軍直取瓜州斷賊路奈何楚漢比畫疆不敢鴻
溝過一步君不見淩煙圖畫古所爭裹尸馬革心知輕貔
貅坐擁識何意豈真不愛千秋名

避兵蔣村

纔得驚魂走全家又避兵繞朝空有恨高克總何情茅屋
三椽破荒村一徑深終當轉溝壑何以了平生

雪山

開門見雪山叢樹連青雲佳氣尙蔥鬱深護高皇墳王業
想當日崛起田間眞運承晉衰祚逐鹿爭紛紛水火救獨
亟捷伐垂功勳英名著千載赫濯應猶神紅頭看蠢爾那
比盧與孫崇朝豈難翦延禍連江濱胡弗顯靈爽一拯彼
黎民豈獨皇故鄉蒙佑常無涇蒼蒼識何意定數誰具陳
深宵自仰望滿眼愁風塵

貽鄰寓周海琴

憂憤知誰識相逢幸有君罪言思杜牧對策想劉蕡身在
家何恤名狂世豈分隔牆鄰暫結莫厭往來勤

與海琴夜話因感往事寄楊子城

百戰徒論口擊功書生何必不能戎莫疑處變詞多激自
切同仇恨未窮落日已虛旌旆影驚濤還雜鼓鼙風因君
慷慨深宵話識得楊修涕淚同

寄家太平洲感賦

欲同天地知何日便擬將身入釣舟北極樓臺終莫忘故
鄉雲樹尙堪愁驚心草木翻風急冷眼魚龍跋浪遊省識
安危非我寄全家且與大江浮

洲寓自遣

帆卸江頭路曲斜車聲軋軋趁歸鴉綠陰深處三間屋指
點前村鄭老家

傷心歲月暗中更乍得風塵此暫清夜半隔牆聞犬吠披

東坡詩集卷十二
衣還覺夢魂驚

轉徙頻煩祇自憐
暫居也要主人賢
喜聞一語兒童說
耕鑿全家近百年

門對池流映碧漪
萬竿修竹更猗猗
不知暑氣消何處
時有清風過短籬

西風昨夜送微涼
綠橘垂垂未放香
說是今年潮水小
幾家早稻已全黃

終歲何曾一入城
田園風景足忘情
養魚種竹渾無事
飽飯安眠過此生

數家煙火不成村
鎮日無人自閉門
最好雞埒豚柵畔
紡車軋軋送黃昏

寂寂柴門夜不關
小橋流水抱彎環
兵戈一任閒人說
何必桃源不世閒

悲鄉民爲陳明皆作兼懷二楊子

王師數十萬不能勦
一賊助威望鄉民彼豈習鋒鏑
大義姑相喻同仇幸能識
二楊尙士流一陳本力穡
奔走兩月餘慷慨棄耕殖
鳴鑼聚岡陵載旆耀阡陌
賊聞膽驚落迹稍斂凶
逆淫掠乃官軍強暴縱朝夕
反若與民仇賊勢愈充斥
耕鑿幸久安出入念帝力
散歸豈本心毋乃有逼迫
近聞府縣官徵募奉軍檄
不吝爵賞殷兼欲盜賊激
罔顧國體傷邦更後患
測傳聞六合民賊船快沈
擊何嘗建奇功不在彼草澤
且莫感時淚暗向深宵滴
作詩自激昂耿

耿望北極

得汪衡甫

本銓

方伯趙伯厚

振祚

宮贊書感賦

潤州烽火日夜驚蘇臺相望不數程但倚毘陵作保障一
若唐代睢陽城二公死守效巡遠帳下恨少熊羆兵書來
分策上中下守不如戰何其明知余洲勇募前日欲令操
艇金焦橫往來江面斷賊路奮擊何慮城難傾水師總統
素所識試往一謁當推誠蘇常唇齒豈不念持書什讀心
怛怛所嗟愚妄不自量獻策徑過丹徒營森嚴軍令那可
曉一戰屢戒師徒輕公雖慷慨誓滅賊焉保要約仍平生
仰天歎息少李郭捷書誰報收西京

橫閘舟感

一帆徑向越河卸慣聽礮聲心不怕江濤靜處聯艨艟高
指紅旗夕陽下軍中號令祕得聞張燈開宴疑崑崙底須
更獻孫吳策儼欲自勒燕然勲宵來轉柁泊何處豈是潛
師渡北固城頭殺氣看依然惆悵江干獨延佇

河莊水涸舟不能進易小車渡江

朝發毘陵驛暮至河莊城舍舟復登陸軋軋聽車聲車夫
頗曉事與我語且行問我從何來得無自軍營軍營諒近
賊出入能無驚或言賊雖暴非如虎難嬰鄉民不知識相
約鑼爭鳴犁鉏奮迎擊遇之無一生官兵況數萬豈不如
蚩氓礮響震日夜何以城不傾我聞欲何答語爾爾豈明
去去勿復道有淚空霑纓

懷邵子顯

遭亂思故人有懷在襲水恨無雙飛翼往從阻葭葦傳聞
姦宄乘亦復兵戎被翦除幸崇朝激變欲誰罪道路雖共
驚薪木諒無毀傷心望金焦野哭多新鬼可堪骨未收揚
塵更東海茫茫天地間側身問何待夷門俗已非燕市客
誰在大江日夜流東望淚徒灑

懷程序伯

消息傳來豈未真東南何處不風塵已聞滬瀆蛟龍入又
見膠城虎豹鄰盡室遷流憐我在幾時慰勞得君親生逢
患難應同恤知否天涯有故人

哭程曉楓

生別已知苦死別那勿悲況同處憂患生死堪更歧念君
與我識形影恆不離金焦北固間三載手共攜覽古動感
喟卽事增歔歔偕隱願未遂禍亂悲忽罹奔走徧郊野奮
激思窮黎雨風冒筋骨鼙鼓悽心脾故里暫歸問辭我情
依依臨歧一揮淚白日愁昏迷秋風起八月鷹隼方高飛
紛紛豈百鳥驚避爭樊籬音書望欲斷魂夢空交馳徑起
一帆挂就君胥江湄心驚白頭烏何事向我哢到門不敢
入哭聲隱柴扉鄉鄰爲我告閭語我尙疑君竟先我死死
豈君自祈生雖憤不樂死得懽獨知恨君不我待兩日偏
我遲執手更何日再見知無時一慟那自已往事堪追思
慨然望京峴到眼仍瘡痍乘閒復竊發滬濱交姦夷兵戈

正擾擾道路多涕洟誰能盡老壽但免溝壑擠君死已不
識我生豈有期哭君更自哭血淚隨流澌

挈家渡江風雨中達常州

洲居過九月候已如嚴冬堪此老病骨更鍊冰雪窮去去
欲何適四望心憂忡道逢估人子歸自胥江東爲言滬城
賊勢蹙已易攻雖然金焦間殺氣騰千重蘇臺路稍遠或
免烽傳紅不如且歸去勝作無根蓬蓰飧況八口自念已
缺供聞言那勿悲涕淚交沾膺

江潮勢浩浩日夜兼天浮秋深漸以落沙淺時膠舟鎮常
各小港曲折無通流巨艇不能適小船任夷猶自從九江
陷私販爭沙洲紛紛載鹽去所過成淹留官吏尙恣意盤

話多苛求往來共攘攘釀禍方心憂豈獨歸未能躑躅頻
江頭礮響聽不絕此患何時休

憂心雖無已歸思那自禁深感主人意導我踰重林一舟
真如葉八口差可任招之令我就送我情偏深道聞六沙
盜剽掠時江心行李慎自戒到日期好音雨風幸昨夜急
溜催寒溽相慶顧僮僕出險知從今回頭望江岸幾度勞
沈吟沽酒定明日繫纜奔牛尋

常錫道中作

推篷一路看楓林傍船忽爾聞鄉音家人相顧有喜色便
思門巷宵來尋吁嗟門巷尋雖好四望妖氛未全掃腰閒
寶劍重摩挲安得光芒燭蒼昊

展謁先祠悽然成此

缺祭心傷非一時今朝始得拜先祠若敖有後悲難免鄢
子無歸痛可知拂拭但教空鼠迹掃除惟恨先蛛絲几筵
常奉知能否滿眼風塵涕淚滋

劉雲卿赴武林枉道來訪

我歸一月未見人世衰俗薄安足論朝來忽聞遠客至披
衣亟起開蓬門相看不暇問何自喜極涕淚先沾巾憶君
昨冬皖江去重兵方報淪陽屯豈意賊帆竟東下金陵揚
鎮悲同淪竹林甘露盡一炬君歸何處堪容身我時奉檄
適黃序倉皇得遇君諸昆語我二親痛轉徙思君更自傷
晨昏便擬寄書少鴻雁那得振翩隨鵬鷗今知避兵阻徽

嶺春盡歸始尋荒村哀哀母喪未克葬養父得免天涯奔
武林學使具書幣匣劍徑赴勞風塵行蹤念我杳莫識扁
舟枉繫胥江濱相逢執手幸意外流離各訴重酸辛嗟今
交誼似雲薄況遭患難誰能親殷勤慰問逾骨肉此意感
激真無倫自古歲寒識松柏必逢峻阪知麒麟平生取友
數厯厯能共休戚應惟君錢江風浪幸未作金焦鼙鼓猶
時聞知君此去豈得已相望兩地空驚魂五陵佳氣尙蔥
鬱終賴諸將成功勲天更一雨洗兵甲舉頭萬里清浮雲
臨歧爲君作豪語好歸獻賦期明春

舟感

江頭消息問猶虛惆悵停橈落日餘欲效秦廷三日哭更

無人與說申胥

戈矛修罷欲誰同來往栖栖恨未窮自笑書生太多事逢人還與誦秦風

聞揚州賊棄城而去

聞道揚州賊空城已厭居重來那可必此去定非虛道路尸猶積亭臺火尙餘不知諸將意何以報 彤除

胡夢花挈家南來暫此僦居

矯矯雲中鵠飄墮忽我前寥天豈空闊萬里無塵煙自我與君別相望各一天兵戈忽滿路消息空江邊重逢雜悲喜辛苦知難言東南數郡縣陷賊愁經年屢聞更將帥報捷虛甘泉非無智謀士軍閭誰能延閱我面黧黑僕僕徒

行閒攜家且我就蛩巨聊同憐酒酣劍頻看高論仍驚筵
誰云賈生徒未解孫吳篇長纓儻君請我願從執鞭感慨
話無已雨雪方連縣

除夕有懷潤州諸同學

兒說今年盡驚心淚欲滋兵戈猶滿眼雨雪況經時轉徙
應無定存亡豈可知何能當此夜獨自酒杯持

意若山館詩稿卷十二終

孫潤庠曾孫家振校字